

Plenchi

Bèl a bati

Bèlèm bèlèm bèlèm tring tring tring. Nos a drenta un aña eskolar nobo nobo. Kada aña eskolar nobo ta duna nos un komienso nobo. Un aña di spseransa pa tur ku ta involvi. Bon bini den un aña nobo, ban huntu ban traha pa hasi e aña eksitoso. Manera nos lema di e aña aki ta bisa: **Teamwork makes the dream work.** Ban pues huntu, duna otro un man pa nos por realisá nos propósitonan di e aña eskolar aki.

Sr. Cijntje di VSBO st. Jozef a laga un ehempel pa nos tur atras di kon ta traha dediká pa logra ekselensia den enseñansa. EL a traha te último dia di su bida pa e skol ku el a stimá. E tabata un ehempel ku trabou duru ta duna fruta. Nada no ta kai foi shelu sin esfuerso. E tabata kritiko, pero mas ku esei e tabata trahadó. Su eksigensianan pa e mes tabata haltu, pesei e por a eksigui otronan tambe pa traha na e soñonan den team. Nos ta kòrda sr. Cijntje ku apresio i agradecimiento den nos kurason.

Tuma su ehempel pa traha huntu paso: **Teamwork makes the dream work.** Felis i un fruktifero aña eskolar pa un i tur.

Orashon di un dosente

Señor dunami e sabiduria pa siña mi studiantenan,
Kon pa biba riba e mundu aki
Kon pa dil adekuadamente kue retonan i
e konfliktonan di e mundu aki.

Tambe pa mi por siñanan pa mehorá nan mes,
No den teoria di buki so
Tampoko pa nan kana manera karne tras di otro.
Pero pa nan siña kon pa skohe e kaminda korekto,
unda ku nan ta.

Pa mi siñanan komprondé e bèrdat eterno,
pa asina nan por distingui bon i malu,
i siña atmirá e bunitesa di naturalesa i arte.

Paso si mi yuda mundu krese den sabiduria i gracia,
Mi lo sinti ku mi a logra,
Dunando e aporte ku mi ta yamá pé.

**Pesei mi ta pidi Bo Tata, pa Bo guiami,
Pa por kumpli ku mi parti.
Ku e afan pa logra forma karakter i konfiansa propio
Anto mas ku tur kos kurasonnan kontentu.**

Riba roster



Asina nos ta korda sr. Humphrey Cijntje.

Riba rapòrt

Tributo na sr. Humphrey Cijntje di st. Jozef VSBO.

Nubia skur

Tambe tin su rant di oro

Mantene bo fe

Haiku Ganado den Arte di Palabra na 2010 skibi pa Humphrey Cijntje

Nos kurason ta gradesido pa e rant di oro ku Humphrey Cijntje a pone den nos eneñansa. Mener Cijntje a logra, apesar di tur kontratiempo, pone un VSBO di kalidat na Korsou. Paso Humphrey Cijntje tabata un homber ku a traha mas ku el a papia. Un homber ku a asumí responsabilidad enbes di tuma e rol di víktima ora ku nubianan skur a paresé. Ku su pashon i determinashon pa e halsa nivel di enseñansa el a bira parti di e rant di oro aki. El a duna e ehèmpel ku nos mester traha ku fé i derminashon kada dia, te ora ku Tata tuma nos.

St. Jozef VSBO ta sinónimo di Humphrey Cijntje. El a laga un bandera i un himno atras pa su skol stimá. Ta pesei bou di kanto di e himno a dobla i entregá e bandera di skol na sra. Cijntje komo muestra di nos apresio pa su pasenshi i sakrifisio durante tur e 42 añanan. E meresé e bandera, símbulo di vishon i pashon pa forma hóbennan na st. Jozef VSBO. Tene duru i mantene boso fe, paso Humphrey Cijntje a laga tras un rant di oro graba den nos enseñansa.

Not'é riba bòrchi

Introdukshon pa personal nobo di RK

Tur aña RK schoolbestuur ta yama bon bini na un kantidat di personal ku ta bin forma parti di e famia di RK. E aña aki un kantidat di 66 persona a drenta servisio di RK na augustus ultimo. Dia 29 di augustus na kantor a organisa un enkuentro ku tur e miembro nobonan pa asina nan sera konosi ku tur e personanan ku nan ta bai tin kontakto ku ne diariamente. E direktornan i tur hefe di departamentu. Tambe e sekretarianan i e personal di PZ. Despues di sera konosi, nan a hana splikashon di e reglanan di kas di RK pa asina nan ta na altura di e informashonnan importante i relevante pa nan. Un biaha mas bon bini serka RK i nos ta spera di por traha dushi ku otro. Riba e potretnan por mira e personal risibiendo informashon.



Informashon na personal nobo di RK



Personal ta pasa dor di e reglanan di kas.



Personal nobo di RK

Den agènda

5 oktober dia di dosente

Fakansi di skol

- **10 oktober pa 14 oktober**
- **19 desember pa 4 yanuari**

Mi ta konta

E karga desagradabel

Yufrou a duna su alumnonan huiswerk. Nan a haña tarea pa skibi nòmber di tur e hendenan ku nan ta odia. Su manisé yufrou a inventarisá kon a bai ku e tarea. Tabatin mucha ku mas ku 5 nòmber, otronan ku 2 i te hasta un ku 15 nòmber.

Despues di esaki yufrou a laga nan skibi bou di kada nòmber dikon nan ta odia e persona.

Kada mucha a hana un saku anto nan tabatin mag di kue mes tantu batata ku e kantidat di hendenan ku nan tabata odia. Nan a haña e instrukshon pa nan hinka e batatanan den e saku i tene e saku huntu ku nan te ora nan haña otro instrukshon.

E saku nan a karga ku hopi molester i despues ku e batatanan a kuminsá hole e peso a bira insoportabel. Tur dia nan tabata lamentá.

Nan a keda aliviá ora ku nan tabatin mag di tira e batatanan afó.

Despues yufrou a puntra nan kiko nan a siña di e proyekto. Nan a papia

di e peso, di e holo etc. Despues yufrou a splika nan ku e kier a siña nan ku ta masha malu pa bo karga odio den bo kurason. E ta bira un peso pa bo i e ta dañá bo kurason. Pesei ta importante ta pa nos laga lòs i no tene hende na kurason. Nos tur ta pekadòr i tin biaha nos ta hasi otro dolor sin ku nos a planie. Pordoná i laga lòs pa asina bo por tin un bida liber di odio i renkor.

Mucha djispou

Suzan a ta haña 5 florin serka su tanta. Su mama ta bise: “Kiko bo ta bisa Suzan?” Suzan ta keda ketu ketu. Mama ta purba un biaha mas:”Kiko mama ta bisa ora papie duna mama sen?”

Suzan ta kontestá: “esaki so, ai no miho bo keda ku ne anto”.